

JOSUÉ

Jawen unanmati janchaki

Moisin akubidanshina keskadi wakin Josué jatun xanen ibudiakin Moisin inun Diosun yusian jeneama jatu pe yunudiakubainikiaki.

Israelin enabu Moisin yunukin jatu kushipa wabia Diosun jancha pe chibanbuma inibu inun Josuédi pe ninkama ibubis bika betsa betsapa tenekubaini Canaán mai pakea anu jikinibukiaki. Jakia jaska Diosun bechipaiai Israelin enabun pe chibanbumawen taexun xukua betsabun jatun mae Diosun jatu yununi ibuwatidubuma inibukiaki

Na una kenenibu uinkin jaska Dios ninkatan chibain nun jiwetidu inun jaska Dios danankin ninkama nun jiwetidudi nukubun nun xabakabi tapintiduki. Jau na una kenenunbun Josuéen jatu yununikiaki, ja añotian 1400-1370 Cristo judiamadan.

Diosun Josué xanen ibu wakin katunikiaki, na janchadan

1 ¹ Jehován tsuma Moisés ma mawashinken chipu Moisin medabewanika Nunen bake Josué Jehová jabe janchakin yuikin:

²“En tsuma Moisés ma mawashinaki. Jene Jordán mian minabu jatu pukemabainxanwen. Maiwan pakea en matu ibuwamaxanai anu jaudi minabu Israelin enabu dasibi jatu iyuxanwen. ³⁻⁴Jatixun tsua jiweabumanu kexa inun Líbano mai mati matipa pakea kexa inun badi jauikidi jenewan Éufrates kexa Hitita nawabun mai pakea badi jikiaikidi Ianenwan Mediterráneo ewapajaida kexa kesukauna ja dasibi namakis matun maiwan pakea ixanikiki. Ja kesukauna anu janu man nixanai anu jaska en Moisés yubani keska wakin en matu ibuwamakubainxanaii.

⁵Min jiweyua jatube detenameaya tsuanda mia binutidubumajaidaki. En Moisés medabewakubidani keska wakin jabiaskadi en mia medabewakubainxanaii, putakin jawa jenebainamadan. ⁶Ja min xenipabu jatu ibu wamakatsi en jatu yubani anu minabu iyukin mai pakea tibi min jatu ibuwamakin paxkaxunxanaiwen taea kushipai jawa dateama chintuntaskayamaxanwen. ⁷Jaska besti en mia yunuaii. Kushipajaidai jawa dateama janida min kai anu unanepai ja min janu

kai anu inun min jawada akai anu ja baiwen kai yusiudi inun yusmaudi dabekeama keskakin jawen yunuti jancha inun jawen nemati jancha en tsuma Moisin mia yusinmadan, chibanjaidakubainxanwen. ⁸Na jabias yusinti janchakidi xaba inun meshu medan shinankin jakidi minabube janchakin jenetaskayamaxanwen. Jaska wakubaini unanepakin en jancha min akubaintiduki. ⁹Janida min kai anudan, eadan, min medabenan Jehová Dios en mibe kaya juinti nishmai jawa dateama kushipai mentsisipakunkainxanwen, ean en mia yunukin nichiaiwen taeadan”, aka

**Josué pukekain mae mebikinankatsi jawenabu
pewamakin taewanikiaki, na janchadan**

¹⁰Januxun jawenabu xanen ibu bexmasbu dasibi ichawaxun Josué jatu yunukin: ¹¹“Matunabu anu kakunkaunkin jatu yunukin: ‘Jaudi nukun mekenika Dios Jehová nuku ibuwamaxanai anu jawen kushipakain nun jatu mae mebin bununbun matun piti bawakin pewatan mabudi dasibi pewakanwen. Xaba dabe inun bestitian Jene Jordán nun pukei bukanaii’, akin kaxun jatu yunukanwen”, jatu watan

¹²Januxun Israelin bake iyua Rubénen enabu pakubainaibu xanen ibubu inun jawen bake betsa Gadin enabu pakubainaibu xanen ibubu inun jawen bake Josén enabu paxkani, jawen bake Manasésin enabu pakubainaibu xanen ibubu besti Josué jabudi yuikin:

¹³—Jehován tsuma Moisin matu yubakin: “Jene kexa nekedia matun mekenika Dios Jehován nawabun mai pakea ma matu mebinxunshinaki. Natian matunabu ukedi jiwexanaibu anu man jatu medabewakin keyutiduki. Jaska watani man bea na mai pepa nekedi Diosun matu ibuwamakin keyushina anu janu chintunkidan man janu juindukunxankanaii”, akin matu yuimadan, ikis shinankanwen. ¹⁴Jaskaken nenu na mai pakea anu Moisin ma matu ibuwamaima anu matun ainbuaibu inun matun bakebu inun matun inabu bashiyubainxankanwen. Matu juni kushipa detenamenikabu besti matun detetiya bui matunabu xuku betsabube jusikain bebunkidi puketan jatubetan nawabu detekin jatu nichinxunkin medabewayukubainxankanwen. ¹⁵Janida Jehová Diosun jatu ibuwamaxanai anu jabudi juindukunun ikaibu jaska matu waxuinma keska wakin Jehován jatu medabewakin keyuken jatianda besti nekedi Jene Jordán badi juaikidi Jehován tsuma Moisin matu ibuwamaima anu matun mai pakea anu jiwei man chintunxanaii, janu juindukuinan. Matunabu xukua betsabubatu janu mai pakea tibi ibu wakin keyudiabuma jatu medabewayukubainxankanwen— jatu wa

¹⁶Josué jancha ninkatan xanen ibu dasibibun jabias kadi shinainbun xanen ibu betsabubatu janchaxunkin Josué kemakin:

—Jawada jaska shinankin min nuku yunua nun mia axunkubainxanaai. Janida min nuku yunuai nun kakunkainxanaai. ¹⁷Moisin jancha nun ninkakubidanshina keska wakin miandi min nuku yunuai nun mia chibandiakubainxanaai. Eskakidi nun mia shinaiin. Moisés medabewakin amakubidanshina keska wakin min mekenika Jehován jau mia medabewadiakubainunwen. ¹⁸Tsuabunda min yunua danankin mia axuanma jau mawaxanunbunwen. Jakia mia ikidan, nuku xanen ibuxuni kushipai datetaskayamaxanwen— akabu

**Jericó mae anu jau unanti watanunbun Josué
juni dabe yununikiaki, na janchadan**

2 ¹Sitim anua kaxun jau june uinbauntanunbun juni dabe Josué jatu yunukin yuikin: “Ukedi Jericó inun jatun mae kesuakea june nuku uinxunbauntankanwen”, jatu wa bui Jene Jordán pukebaini juinti kushikain Jericó anu jikitan janu uxanun ika Rahab ainbu jininipa dasibibun memis jiwe anu jikia maniabun ²tsuanda Jericó xanen ibu yuikin:

—Ikis meshu medan Israelin enabu dabe nuku june uinun ika Rahabin jiwe anu ma jikiabukiaki— aka ³Jericó xanenibun jatu yunua jawen detenamenikabu buxun jatun xanen ibu janchaxunkin Rahab yuikin:

—Nawa dabe mianu juxukiaki. Nedi nuku kainmaxunwen. Nuku june uinbaunun ika beabuwun taexun min jiwe anu jikikanxu nedi jatu iwewe— aka

⁴⁻⁶detenamenikabu bediabama jawaida jatu mistutan Diosun Israelin enabu duawamis Rahabin ninkaimaxun jawen jiwe sapa xeni mamaki jatu iyuxun jawen yumen wati basiwan badinwankin manchinshina naman jatu junekin adubiaxun detenamenikabu padankin Rahabin jatu yuikin:

—Chanima juni dabetun ea uinwanxuki. Jakia jadakidiada beabu en unanma ixuki. Badi jikiaya nukun mae jikiti xui tibi man bepumis ma kemaya nenua taxnibainkanxuki. Jadakidi buaibu en unanmaki. Man jatuki nukukatsis ikaidan, jawaidabain jatu chibantankanwen— jatu wa

⁷jawen jancha ikonwain Jene Jordán pukea baikidi jatu achinun ika benai detenamenikabu kushibain uintankin bechiama juxun jatun mae mishki kenebaunibu anu jikiti xui tibi ma jawaida bepuabu ⁸Israelin enabu dabe uxadiabama jawen jiwe sapa xeni mamaki Rahab ana inaxun jatu yuikin:

⁹—Na mai pakea Jehová Diosun matu ibu wamaikiki, en unanan. Dasibi nenu jiweabu nun datei keyuiai, matuwun taeadan. ¹⁰Jaska Egipto anua man paxaibu Jehován Ianenwan Tashipa matu paxkaxuna man pukebidani inun Jene Jordán ukedi kexa betsaudia Amorreo nawa xanen ibu dabe Sihón inun Og jatunabube man jatu yamawaimaidan,

nun unaiin. ¹¹⁻¹²Man jaskakubidanai ninkai nukun juinti nishma matu tsuan binutidumawen taea tsua nun ana shinan chankanbumaki. Matun mekenika Dios Jehován jamapai nai anu inun jamapai mai anu mekenika menan datan akin na jabiatian ea yubadikanwen. En matuki chanichakama adukin duawaxunwen taexun en epan enabu man duawaxanun Jehován kenawen ea yubakanwen. ¹³En epa inun, en ewa inun, en puibu inun, en betsabu inun, jatun enabus jau mawayamaxanunbun man jatu deteama ixanai chanima janchawen ea yuikanwen— jatu wa

¹⁴jawen jancha bechipaikin betsan yuikin:

—Min nukukidi jawa jatu yuiama nuku tenanbumawen taea mia inun minabudi man mawama ixanai, nukun jiwea inananain keskaidan. Na mai pakea inun min mae Jehován nuku ibu wamaya miwen nuikin nun mia duawaxanai, mia padanmadan— aka

¹⁵ja mae mishkiwen kenekin kebenbaunibu mamaki ja ainbu ibuan janu jiwe waniwen taexun janu uinti xui manaundi anuxun xabakan meshu medan tsuan uianma dispiwen jatu butumakatsi ¹⁶Rahabin ana jatu yuikin:

—Jau matuki nukuyamanunbun mananan paxai buyutankanwen. Janua xaba dabe inun besti jadi juneyuxankanwen. Matu benabaunkin keyutan chintunbidanaibun ukedi ana man pukebaintidubuki— jatu wa ¹⁷⁻¹⁸jatu butediaman jabun kemakin:

—Nukun detenamenikabube na mae ewapa anu nun jikiaya na uinti xui anu min nuku butuai anu jabianudi dispi tashipa paninwanxun min epa inun, min ewa inun, min puibu inun, min betsabu inun, minabun enabus min jiweanu jatu ichawaxanwen, ja dispi tashipa panian uinkin jau tsuan matu meyamaxanunan. Jaska nun mia yunuai min akamaken min nukube yubakaxu nun mia axuntidumaki. ¹⁹Jabiatiandi tsuabuda min jiwe anua taxnibainabu nukunabun jatu deteabu minabu mawa ibubis jatuna ixankanikiki. Jakia min jiwe medanxun nukunabun minabu deteabu mawaibun chakabudan, nukuna ixanikiki. ²⁰Jakia ja dikabi nukukidi min xanen ibu min yuiaidan, jaska nun mibe yubakaxu nun mia apanan jaska min chanichakai unantan nun mia medabewama itiduki— aka

²¹—Peki. Jaska man yui ai jau jaskaxanunwen— jatu watan nichinkin jawen jiwe manaundi uinti xui anua dispiwen jatu butea buaibun jawen uinti xui anu Rahabin dispi tashipa paniwan

²²mananan ja dabe mapekeshina jadia xaba dabe inun besti juneyuabu jenekidi bai yusiudi inun yusmaudi jatu benajaidabiabu jawa jatu bechiabuma jatu bena keyubidani atimas jatun mae Jericó anu chintunbidanaibun ²³janua mananan bushianbu bututan ja unantinikabu jene pukebaini jatun xanen ibu Nunen bake Josué anu jikixun jatu jaska washinabu jabun banabimakin ²⁴bestichaitun yuikin:

—Chanimaki. Ja mai jidabi Jehován nuku ibu wamaikiki. Ja dikabi dasibi janu jiwebaunabu nukuwen taea datei jatun jointi nishmai ana kushipa jayama punu nukai keyuabukiaki— aka

Jene Jordán pukenibukiaki, na janchadan

3 ¹uxashini penama Josué jawenabube bututan Sitim anua bui Jene Jordán pukediamu jene kexa anu niti itushitan jatun tadi jiwe ana puntebaunabu ²janua xaba dabe inun besti jatun tadi jiwe tibi anu buaketankin jatun xanen ibu bexmasbun jawenabu ³jatu yuikubaunkin: “Nukun mekenika nukube yubakani Dios Jehován jancha aduni bau Levín enabu Diosbe nuku janchaxunikabun buaibu uintan nenua matudi bukin jatu chibanxankanwen. ⁴Jakia jaskaida jatu dapijaida buama benanta duakabi bukin jatu chibankubainxankanwen, 1,000 metro niti ikubainidan. Jadidi nuku iyuaibu jatu uintan jatu chibankubainxankanwen, jadidi nuku iyuaibu ja bai man unanmakidan”, jatu wakeakeaibun

⁵januxun jawenabu ichawaxun Josué jatu yuikin: “Meshukidi matun besuubi Jehován jawen kushipawen jaskabiamu wakin matu dami waxunxanaiwen taexun Dioskidi besti shinain pepa bestiyukanwen”, jatu watan ⁶jatube uxashini bestenkauan Diosbe jawenabu janchaxunikabudi Josué jatu yuikin: “Nukun mekenika nukube yubakani jancha aduni bau iabaini nukunabu bebun matu dukun pukui taebainxankanwen”, jatu wa ja jatube yubakani jancha aduni bau ji dabe jaya jawen iabaini jatunabu bebuxuni jenekidi bui taeaibun ⁷januxun Jehován Josué ana yuikin: “Minabu en mia jatu kayati wamakin na jabiatian en taewaii. Unudi min xanen ibu kushipai en mia ewawamabainkin jatu uinmakubainxanaii. Jaska en Moisés medabewakubidanimu keska wakin minabun bedubidi xanen ibu kushipa wakin mibe nixun en mia medabewakubainxanaii. ⁸Ja dikabi en matube yubakani jancha aduni bau ja jawenabu ebe janchaxunikabun buaibu jatu yunukin: ‘Jene Jordán kexa pukui taekain jau niti ixanunbun’, jaska ea jatu yuixunwen”, aka jabias jancha jatu yunutan

⁹jawenabu ichawatan Josué jatu yuikin: “Jehová Diosun jancha ninkai eanu bekanwen”, jatu wa bea ichabu ¹⁰⁻¹³jatu yuikin: “Uinkanwen. Mai jidabi jatun dami wani jawen ibu jatube yubakani jancha aduni bau matu bebun bebunkidi Jene Jordánkidi pukui bukanikiki. Ja bau iabaini bui Jene Jordán anu Diosbe matu janchaxunikabu pukutanaibun jene dami jamebi paxkai ja jene manankidia kushibidani niti ika pes daka uinkin Dios jiwea matube nia kakunkainai man uinxanaii. Januxun jatun matu medabewakin Canaán nawabu inun, Hitita nawabu inun, Heveo nawabu inun, Ferezeo nawabu inun, Gergeseo nawabu inun, Amorreo nawabu inun, Jebuseo nawabu matun bedubi nichinkin jatun mae tibi matu

mebinxunkin matu ibuwamaxanai man uinxanaii. Jaskaken man xukua tibi anua june bestichai tibi katukanwen, 12 juni kushipabudan. Ebe buaibu daya betsa en jatu yunuxanaii”, jatu wa

¹⁴Januxun jatu jaska washina jatun tadi jiwe pewaibun jau Jene Jordán pukei bununbun jatu bebuxunkaini Diosbe jatu janchaxunikabu Dios jatube yubakani jancha aduni bau iabaini bui ¹⁵jenekei kematan ja jabun bau iabaini pukenun ika jatun tae pukuaibun janu jatun yunu tsekattian jene bai matakin mai achibidanmistian ma iki jene bai matai kushipaya ¹⁶jene dami jamebi paxkai niti iki detenamenikabun mae kushipa Saretán dapi mae betsa Adam anu manankidi chitei ian keskaya janua jene maikidi netsubaini Ianenwan Mar Muertokidi bui netsui xa ibainaya Jene Jordán namakis Dios jatube yubakani jancha aduni bau ia niti ika mapuyubun bai mata netsui keyua mae Jericó besusi jene taxkanun Israelin enabu jawaida kapukei pukebainaibun ¹⁷dasibi Israelin enabu pukei keyudiabumaken Diosbe jatu janchaxunikabun Dios jatube yubakani jancha aduni bau iaxun jene netsua tsusin namakis anu mapuxun jatu manayuaibun

**Jordán Jene netsua medanua 12 mishki
mapemanibukiaki, na janchadan**

4 ¹Israelin enabun Jene Jordán ma puketan mapekei keyuabun Jehován Josué ana yuikin: ²“12 juni kushipabu Israelin enabu xukua tibi anua bestichai tibi min jatu katubidana kenaxun ³jatu yunukin: ‘Ana chintunbain janu Diosbe janchanikabun jawen yubakani jancha aduni bau ia niabu anu Jene Jordán namakis anua 12 mishki tunke ewapabu iatankanwen, janu man uxaibu anu buxun jau manchinunbunan’, akin jatu yunuwe”, aka

⁴ninkatan ja 12 juni katubidana jatu kenaxun ⁵Josué jatu yunukin: “Ana chintunbain Jene Jordán namakis Diosun jancha aduni bau ia mapuabu anu buxun Israelin 12 juni bake matun xenipabu tibitun enabu xukua tibibun mishki bestichai iatankanwen. ⁶Ja mishki man bitanxu jawen unanmati inunbadikiki. ⁷Chipu matun bakebun matu yukakin: ‘Na mishki kekua bestichai tibidan, ¿jawamen?’ ikubainaibu jawen jatu yusinkin: ‘Nun jene pukebidanaitian Jehován yubati jancha aduni bau jabu bebunkidi buaibun bai matajaidabiaken ja jene jamebi paxkaniwen taexun na mishki tibi bitan nun nichiniki’, akin man jatu yuikubainxanaii. Januxun nukunabun uinkin jau shinanpakexanunbun jabundi jatu yuinunbadikanikiki”, jatu wa

⁸jawen jancha ninkaxun jaska Jehován Josué yunuxu keska wakin 12 mishki Jene Jordán namakisa Israelin enabu xukuabu tibibun jatu bixuan janu uxaibu anu buxun manchintan ⁹januxun ana jene namakis anudi Jehová jatube yubakani jancha aduni bau ia mapukanxu anudi 12 mishki

ewapa Josué jatu manchinmadianikiaki. Jene medan jikibain ja mishki manchinibu mania tsuabunda uindiatidubuki.

¹⁰⁻¹¹Jaska Moisin Josué yunuima ikis jau anun Jehován Josué yunua jawenabu imakin Josué keyudiana Jene Jordán namakis anu Diosbe jatu janchaxunikabun jawen jatube yubakani jancha aduni bau ia manayuaibun Israelin enabu jawaida jabu dukun pukebainaibun ¹²ja dikabi jaska Moisin jatu yunuima keskai Rubén enabu xukua junibus inun Gadin enabu xukua junibus inun Manasésin enabu xukua junibuns jatun detenametiya bui jatunabu xukua betsabu jatu medabewai bebunkidi jabudi pukebaini ¹³40,000 detenamenikabu mapeketans nawabube Jehová detenamexuni bui Jericó besusi mai panpa anu jikiaibun ¹⁴Moisés jiwexun jatu yunua ninkai jaki mesekubidanimabu keska wamakin na jabatian Jehován Josué amai uinkanxu jawenabundi jawen jancha ninkakin jau jakidi pe shinankubainunbun jaska Jehován amanikiaki.

¹⁵Jhován Josué ana yuikin: ¹⁶“Jene Jordán namakis anua jau mapekebidanunbun en jatube yubakani jancha aduni bau iabu jatu kenawe”, aka ¹⁷Diosbe janchaxunikabu Josué yuikin: “Jene Jordán namakis anua mapekeki bekanwen”, jatu wa ¹⁸pukebidani jene anua jawaida mapekei metuanu maputanaibuns manankidia jene ana tuebidani matajaidanikiaki, pukekiabuma ixu keskaidan.

¹⁹Badi bena jawen uxe ja dukun jawen día 10tian Jene Jordán pukei mapekebaini mai panpa anu Jericó badi juaikidi Guilgal anu kai jikixun jatun tadi jiwe ana puntebaunabun ²⁰Jene Jordán namakis anua 12 mishki tunku ewapa iabainabu Josué manchinkin sedentan ²¹jawenabu yuikin: “Chipu matun bakebun man jawen ibu tibi matu yukakin: ‘Na mishki ewapa nichinkin sedenibu ¿jawamen?’ ika yuka inunbadikanikiki. ²²⁻²³Jaska yuka ikaibun jatu yuikin: ‘Nadan, nukunabu Jene Jordán namakis netsua anua bexun manchinibuki. Jaska nukubudi Ianenwan Tashipa bai waxun Diosun netsukin taxka wa nun pukeni unantiki’, akin jatu yusinkubainunbadikanwen. ²⁴Diosun matu jaska waxuniwen taexun mai jidabi anu jiwebaunabun matun mekenika Dios Jehován kushipa unanxankanikiki. Jaskawen taexun matun mekenika Jehová duawakubainxankanwen, jeneamadan”, jatu wanikiaki.

Guilgal anu jiwetan jatun jina kubichi jatu mextenibukiaki, na janchadan

5 ¹Israelin enabu jau Jene Jordán pukenunbun Jehován nemakin jatu netsuxunshinken badi jikiaikidia Amorreo nawabu xanen ibubu inun Ianenwan Mediterráneo kexa anu jiwebaunabu Canaán nawabu xanen ibubu dasibibun jatukidi ninkatan mentsisipa detenamenikabubia jatun jointi nishmai Israelin enabuki datei punu nukai ana kushipa jayabuma Israelin enabube detenamekatsi ikama inibukiaki.

²Januxun Jehován Josué ana yuikin: “Mishki nupe ichapa wawe, kenupa wakinan. Jaska watan Israelin enabu juni tibi jatun jina kubichi bisbuma ea jatu mextemaxunwen, ea ikunwain jawen unanti wakinan”, aka

³mishki nupe ichapa waxun Mati Aralot anuxun Josué jatun jina kubichi jatu mextemanikiaki. ⁴⁻⁶Eskawen taexun Josué jatun jina kubichi ana jatu mextemakin taewani matu yuinun ea ninkakanwen. Israelin enabu juni dasibi jatun jina kubichi mextekeyabu Egipto anua taxnibidani janu tsua jiweabumanu bukubauni juni ewai 20 año jayabu detenamenikai taekin jabun Jehován jancha ninkakin chibanbumawen taexun mai pepa jatun xenipabu Diosun jatu yubani anu jau jabu jikiyamaxanunbun, Dios jamebi yubakai: “Mai pepa anua piti pepa shadabu jau uinyamaxanunbunwen”, ikimaxun janu tsua jiweamanuxun Diosun jatu kupia bai namakia debukubidanaibun 40 año jawenabube jatu imakubaunaya ja juni ewai mentsisipai taeaibu Egipto anuxun ma jatu jina kubichi binibu paxayamabu ja junibu jadia mawakubidanaibutian jabun bake wabu janu tsua jiweamabumanua kainkubidanaibu jatun jina kubichi mexteama ikubidanimabun ⁷jaskawen taexun Josué jatun jina kubichi jatu mextemakin janu tsua jiweabumanu ja juni ewabu mawakubidanaibutian jatun xantukun juni bake ichapa Diosun jatu pajaida wakubidanshina jawen Dios ikunwain unanmati wakin ja junibu dasibi jina kubichiyabu Josué jatun bimakin mextemakin keyudianikiaki.

⁸Jawen Dios ikunwain unanmati wakin jatun jina kubichi bikin jatu keyuabu jau xuxai isin mainyununbun jatun jiwe medanxun jatu manai mani bestiyuabun ⁹januxun Jehován Josué ana yuikin: “Egipto anu jiwexun jatun chakabu tibi tapinixun man jawen ea dakewakubidanimabuki. Jakia man ma jatun jina kubichi jatu mextemawen taea en ana matuki dakeamaki, matun chakabu ana shinanmadan”, anikiaki. Jaskawen taexun ja mae kenakin: “Guilgalki”, amisbuki. Guilgaldan, nukun janchawenan, “Jatun Chakabu Putakin Tadan Keska Waniki.”

¹⁰Jericó besusi mai panpa anu Guilgal anu jiweyukin janu taxni taebidanibu uxe babekei 14 díatian badi kaya ja Pascua ikaya jaska Egipto anuxun Jehován detenika nai tsuman jatu mabidis abaini shinankin besikin ¹¹ja xabatian misi xaxawatiuma inun xekiwan trigo tsui pikin taewabaini uxashini ana bestentan ja mai pepa anua piti yumemis pikin taewashina ¹²ana penaya jatun piti nai anua Diosun maná dudu misi ana jayamawen taexun Canaán mai pakea anua piti shadabu janu pikin taewabainibukiaki.

Jhován nai tsumabun xanen ibube Josué janchanikiaki, na janchadan

¹³Xaba betsatian Josué Jericó dapi ka niken juni betsa taxnia jawen deteti machatu chaipaya tsuma nia uintan kai jaki kemaxun Josué yukakin:

—¿Min nukun medabenanmen? ¿Ja jabu nukuki sinataibu min jatuna daka? Jaskada kayamenkain, ea yuidiwe— aka

¹⁴—En minama inun en jabunamadiki. Jakia Jehován nai tsuma kushipabu en jatu yunumis en jatun xanen ibu juaki— aka ninkatan danti iki beti ixun Josuéen yukakin:

—En xanen ibuun, ¿jawa min ea yununun ika juamen? En min tsuma en nenuki. Ea yuidiwe— aka

¹⁵—Janu min pai anu Diosun ma pepawadan, medibi meseki. Diosun jancha mia yuinun Dioski mesekin jawaida min bichi tae pekawe— aka ninkatan jawaida Josuéen jawen bichi tae pekaxunikiaki.

**Jaska watantankin Jericó jau ibuwaxanunbun
Jhován jatu yununikiaki, na janchadan**

6 ¹Israelin enabuki datekin nemanun ixun jabu tsua kaintidubumawakin inun Israelin enabu jikitidumawakin Jericó mishki kene keyatapakauna jawen jikiti xui tibi bepukin mestenwankin keyuabun ²Jhován Josué yuikin: “Uinwen. Jericó en mia yunuaii. Adiwe. Jawen xanen ibu inun jawen juni detenamenikabu jatu maamatan en mia jatu mebinmaii. ³⁻⁴Xaba tibi mae dunkei bestiwai maputantaxankanwen, 6 díadan. Matun juni detenamenikabu jawen detetiya inun en matube yubakani jancha aduni bau iabu bebunkidi ⁷ebe matu janchaxunikabun chaxuwan maxun pudi ati chaan chaan akin mawakubainaibun xaba tibi dunkekin jatu iyutantaxanwen. Janua séptimo díatian ebe matu janchaxunikabun jatun chaxuwan maxun chaan chaan akin mawakubainaibun matun detenamenikabu iyukin jatu dunkemabaunxankanwen, ⁷kidan. ⁵Jaska jatu yunushina itan itani keyutan mapubaunabun chaxuwan maxun chaan akaibu jui kain betsatanya ninkatan dasibi jau jui kushipawen sai sai ixanunbunwen. Ja sai sai ikaibun jawen nemati mishki kenebaunibu jamebi di iki keyuaya juni dasibi jaudi besuabuudi bui jatu detenun ika mae medan jau jikibainxanunbunwen”, aka

⁶ninkatani juxun Josuéen Diosbe jawenabu janchaxunikabu kenaxun jatu yuikin: “Jhová nukube yubakani jancha aduni bau iabainaibun chaxuwan maxun pudi ati chaan chaan akubaini matu ⁷dukun bebubainkanwen”, jatu watan ⁷jawenabu dasibi yuikin: “Ja mae dunkei bukanwen, ja detenamenikabu bebuaibun Jhová jatube yubakani jancha aduni bau iabainaibun jachun betsabu buaibu jatu chibanbainidan”, jatu wa

⁸dasibibun ninkatan jaska jatu yunuxu keskai Diosbe jawenabu janchaxunikabun Jhová jatube yubakani jancha aduni bau iabainaibun ja ⁷bu bebubainkin chaxuwan maxun chaan chaan ati mawakubainaibun ⁹detenamenikabu bebun jabu Diosbe jawenabu

janchaxunikabu chibanbainaibun jabun jatu mekea betsan jatun yubakani jancha iabainaibu jabun pechiudixun jatu uinxunbainaibu inun chaxuwan maxun chan akin mawakin jeneabumaken ¹⁰jabiatiandi Josué jawn detenamenikabu jatu dasibi ana yuikin: “Matun jui jau ninkayamanunbun sai sai iyamakanwen. Ja dikabi: ‘Sai sai ikanwen’, iwanan, en matu yunudiana janchama pes buaketanyukanwen. Chipu: ‘Jui kushipawen sai sai iki keyukanwen’, akin en matu yunuxanaii”, jatu watan

Jericó maewan jatu achikin detenibukiaki, na janchadan

¹¹Jehová jatube yubakani jancha aduni bau Josué jatu iamabaunkin maewan Jericó jatu dunkemabauntankin jatun tadi jiwe puntebaunshinabu anu ana jatu iwea uxashini ¹²⁻¹³penaya Josué bestenxun jatu ana yunua Jehová jatube yubakani jancha aduni bau Diosbe jawenabu janchaxunikabun iabainaibun ja 7 Diosbe jawenabu janchaxunikabundi chaxuwan maxun tsuma jatu bebuxunkin chaan chaan akin mawakubainaibun inun dasibibu bebun detenamenikabu jawen detetiya jatube butani ¹⁴xaba ja kachu Jericó ana dunkebauntani jatun tadi jiwe anu ana chintuanbu jabiaskastantankin 6 día dunkekin keyuabu

¹⁵jakia jawen jenei séptimo dífatian penamajaida bestein keyutan xaba betsatian ishianbu keskai dunkekin taewai 7ki maewan Jericó dunkebaunkin keyuaibun ¹⁶Diosbe jawenabu janchaxunikabun chaan chaan akin jeneabuma jawen jenei séptimotian buankin chaan akin chaipa waibun Josué jatu yunukin: “Sai sai ikanwen, na maewan Jehová ma nuku inainkikidan. ¹⁷⁻¹⁹Ja mae medibiki. Ja inun, ja medan mabu Jehová naki. Juni dabe nun yunua medabewakin ja ainbu jininipa dasibibun memis Rahabin jatu adukin juneshinawen taea Rahab inun jawen jiwe medanuabu ja besti tenanma jiwemakanwen. Januxun betسابu dasibi tenankanwen. Jakia jatun mabu dasibi medibiki, Diosunadan. Mekin biyanamakanwen. Ja mabu medibiwen kemukin bikin man ibu waken Jehová Dios man nukuki sinatamatiduki. Uindakanwen. Nukuki sinatakin nuku kupikin yuputiduki. Jakia jatun plata inun, jatun oro inun, jatun bronce mane mabu inun, jatun hierro mane mabu medibiki, dasibi Jehová nadan. Ichawatan Jehová nun aduxunxanaii”, jatu wa

²⁰⁻²¹Diosbe jawenabu janchaxunikabun chaxuwan maxun chaan akin chaipa waibun ninkatan kushipawen sai sai iki bis ichakayamai chaipaibun Jericó maewan mishki kenekauna di iki keyuaya jawen deteti machatu chaipaya juni tibi bebubain jiki keyutan dasibi jatu detekin junibu inun, ainbuaibu inun, bake mishtinbu inun, anibu inun, yuxabu inun, jatun ina awa dasibi inun, jatun chaxuwan dasibi, inun jatun asno dasibi yamawakin jatun maewan jidabi achiabu

22 janua juni dabetun june uinbauntanshinabu Josuén jatu yuikin: “Ainbu jininipan jiwe anu jikixun jaska man jabe yubakashina keska wakin ja ainbu inun jawenabu jatu taxnimatankanwen”, jatu wa 23 buxun Rahab inun, jawen epa inun, jawen ewa inun, jawen puibu dasibi jatunabuya jawen jiwe anua kainmatan Israelin enabun mae benanta dapi jatu mekekin iyuaibun 24 jatun plata inun, jatun oro inun, jatun bronce mane mabu inun, jatun hierro mane mabu jatu ichawamaxun Josuén jatu yunua buabun Jericó maewan jidabi kuakin yamawakin keyuabu shinanxun Jehováki nukuti tadi jiwe medan jawen meketi dintu anu ja mane mabu mekekin Josuén adunikiaki. 25 Jau uintanunbun juni dabe Josuén yunua jatu juneshinawen taea Rahab inun jawenabu Josuén jatu mekekin tenanma iniwen taea ikis Israelin enabube Rahabin enabu jusini ma jiweabukiaki.

26 Jericó jatu kuamakin keyutan yupu janchawen Josuén jatu yuikin: “Uindakanwen. Na maewan Jericó jadatuda xanenibun ana mae bena wakin beniai Jehováni yupuxanikiki. Mishki kenebaunkin taewaya kupikin jawen juni bake iyua tenanxanikiki. Janu jikiti xui bebuti waya jawen juni bake jawen jenea tenandiaxanikiki”, akin nemakin jatu unanmanikiaki. 27 Jaska wakin Jehováni Josué medabewaya Josuéwen datei mai pakea jidabi anuxun yuda xukua betsa betsapabun jawen kaka kena kaya ninkakin keyubaunibukiaki.

Acánen chakabuwen taexun Diosun jatu kupinikiaki, na janchadan

7 1 Judán enabu betsa jawen epa Carmí inun, jawen juchi Zabdí inun, jawen juchin epa Zérahdan, ja juni Acán jatun jatu chakabuwakin mabu kuatibiaken jawen kemukin Josuén yunutiki meseama mabu betsa jawendua jawena wanun ixun bixun june aduawen taexun dasibibun akanxu keska shinain Israelin enabuki Jehová Dios sinataya

2 xaba betsatian mae Betel anua badi juaikidi mae betsa Bet-avén dapi Ai anu jau uinbauntanunbun juni eskadabes Josuén Jericó anuxun jatu yunukin: “Aikidi buxun june mapekebain uinbauntankanwen”, jatu wa ninkatan mapekebain Ai dapi june uinbauntani 3 chintunbidan Josué anu bexun betsan yuikin: “Nukunabu dasibi jau buyamaxanunbunwen. 2,000 juni detenamenikabu kasmai 3,000 besti min jatu yunutiduki, nukunabu ichapa jatu yunuamadan. Ai mae anu jiwexun jabun mekeabudan, mawaida ichapabumaki. Jatu maamatan ja mae nun ibuwatidubuki”, akabu

4 jatun jancha Josuén ninkakin ikunwantan 3,000 detenamenikabus besti jatu yunua bui mapekebain jatu maemapananbun Ai junibun jatun machatu chaipawen jatu detekin maemabu Israelin enabu jatuwen datei kushibidanaibu 5 jatun mae jikiti xui dapixun jatu detetiyaxun chibanbidankin machi buteaibu jatu detekubidankin 36 Israelin enabu

debuwatan Sebarim anu jatu jenebainabun jatu jaska wabu Israelin enabu dasibi datekin ma jatun kushipa benua punu nukabidanaibun

⁶Josué inun jatun xanen ibubube juinti nishmajaidaxun jatun tima tadi ushnitan isin tenei keskai mai mishpu mapu tukutan Jehová jatube yubakani jancha aduni bau besuudi daxka ikain beti ika beua badi chaitanai manibai janua badi kaya ⁷atimas Josué Jehová yuikin:

—¿En peidawa! En xanen ibu Jehovahán, ea ninkayuwe. Amorreo nawabun jau nuku yamawanunbun ¿jaskakin Jene Jordán min nuku pukemashinxun min jatu nuku binumaxumen? jabiaudi jene pukeama niti itan nun jiwepananan. ⁸¿Nun pemaki, Xanen Ibuun! Ma nukuki sinataibun enabu Israelbu jatu tenanbu paxai kushibidankanxuwen taexun en jawa mia yuitimaki. ⁹Enabu kushibidankanxu ninkatan Canaán nawabu inun ja dapi nawa tibi dasibi nenu jiwebaunabu benimai xukui dasitan nuku dasibi detekin keyutan nukun kena ana nuku shinantimawaxankanikiki. Jaska watan min kena kushipawen min nuku iwekubidanshinadan, ¿jaskada mikidi shinanxankanimenkain?— aka ¹⁰sinatakin Jehovahán Josué kemakin:

—¿Jaskai e iskidan main beti ika min dakamen? Beniwe. ¹¹Minabun chakabuwakin ma kaneshinabuki, en jatube yubakabiani ea chibankin axunkin pewama kanekinan. “Ja mae anua mane mabu ena bixuntan mabu betsa kua keyukanwen”, min jatu wabia jaska chakabu unanbiakin oro inun pei jexe inun tadi jawendua june yumetsuxun jawena wakin buxun jatun mae anu junebain adushinabuki. ¹²Jaskawen taexun minabun jatuki sinataibu jatube detenamei kabia jatu maemama kushibidanshinabudan, ja jaska chakabuwashinabuwen taexun matu kupikin en matu yamawatiduki. Ja mabu yunukin metima en washina ja yumetsushina anua min jawaida bitan yamawamaken eandi en matu ana medabewama ixanaii, man ana detenameaitianan. Detenamei bua man ana paxa bestikunkainxanaii. ¹³En matu ana medabewatidumenkain, min shinain benikain en daenun minabu dasibi ichawaxun jatu pewadiwe, eska jatu yuikinan: “Meshukidi eanu bekatsi jau petan benunbunwen. Eadan, en Israelbun mekenika Dioski. Ean jatu yuikin: ‘Israelin enabuun, ea ninkakanwen. Jericó anua mabu kua keyuti en yunubiaken kua keyuama man betsa adubainshina man jayaki. Ja mabu tsuanda bixun man kuama ishianwen taexun nawabu matuki sinataibu man ana jatu maematidumaki’ ”, akin na jabias jancha en mia yuixu ea jatu yuixuntanwen. ¹⁴Jatu jaska watan meshukidi Israelin enabu xukua tibi nenu ea jatu uinmakin iwexanwen. Xukua betsa bestichai en katua jatu anu jatun ibuan kenawen pakeabu tibi ea jatu uinmakin iwebidanbidanxanwen. Ja pakeabu betsa bestichai en katua jawenabuya tibi ea jatu uinmakin iwebidanbidanxanwen. Jatube jiwea juni bestichai tibi en katua ea jatu uinmakin iwexunxanwen. ¹⁵Tsuanda atimapa

wakin chakabuwakin mabu medibi bishian katukin jadatuda en mia unanmaxanaii. En matube yubakabiashina en jancha danankin jawen dakewati washianwen taexun ja juni tenantan jawenabuya inun jawen mabube kuaxankanwen— aka

Jawen chakabuwen taexun Acán tenanibukiaki, na janchadan

¹⁶ninkatan uxashini penamajaida Josué bestentan jatu yunua jadatu juni chakabumenkain unanti wanun ixun Dioski nukuti tadi jiwe puntea besusi Israelin enabu xukua tibi jatu ichawaken Jehován ja ichabu anua Judán enabu metumakin katuma ¹⁷januxun Josué unantan Judán enabu anu jatun ibuan kena tibiwen pakeabu tibi Josué jatu kekuntan jatu uinmakin Zérah enabu Jehován katua Zérah enabu jabu dapi jiweabu tibi Josué jabu tibi jatu itantana Zabdín enabu Jehován katua ¹⁸januxun Zabdín enabu anua jiwe ibu bestibu tibi Josué jatu itantana Judán enabu Carmín bake Acán jawen juchi Zabdí inun, jawen epan juchi Zérahdan, Jehován katukin Josué unanmanikiaki.

¹⁹Ma unanmawen taexun Josué Acán yuikin:

—En jaibuun, ea ninkawe. Nukun xenipabu Israelin mekenika Dios Jehová pepawen duawakin kenwankin min jaska washina juneama ea yuiwe— aka

²⁰Acánen Josué kemakin jaskashina yuikin:

—Chanima en chaniai. Israelin mekenika Dios Jehován jancha danain en chakabushinaki. En eska meshinaki. Mia yuinun ea ninkawe. ²¹Jericó nawabu nun jatube detenameitian jatun mabu uinbaunkin Babilonia anua tadi peyabukuti jawendujaida inun, 200 plata pei jexe inun, oro tude pishta medio kilo binua bechixun jawen kemukin bibain en tadi jiwe medan mai pukintan ja dukun pei jexe manchintan janua oro tude janatan jamamaki peyabukutiwen achimaxun en maiwashinaki— akaya

²²jaska Josué ninkatan jau jawaidabain bitanunbun junibu Acánen tadi jiwe anu jatu yunua kushibain jikixun mai pukinxun ja medan janu adushina ja peyabukuti jawendua inun, oro tude pishta inun, ja dukun uke medanjada plata pei jexe adushina bechitan ²³bitan jatun xanen ibu Josué inun jatunabu ichabu anu bexun janu Dioski nukuti tadi jiwe bebun manchianbu ²⁴Josué uintan Acán jawen bakebuya inun, dasibi jawen inabuya inun, jawen mabu dasibiya jau mawa napaku Acor anu iyununbun yunutan

²⁵jadi iyuabu Josué Acán yuikin:

—¿Jaskakin nukuki Dios sinatamakin atimapa wakin min nuku chakabuwashinamen? Natian miadi Jehován kupiaya min nuku tenemashina keskadi miandi min meai— akaya januxun Israelin enabu dasibibun mishki tudewen tsaka tsaka akin Acán jawen bakebuya tenankin keyuxun chiwen jatun yuda kuakin keyutan ²⁶achimakin

mishki tude jaki puta puta akin ichapa jaki maspu wanibukiaki. Ja jaska wanibu natian uinpaketidubuki. Israelin enabuki Jehová sinatajaidashina Acán kupikanxuwen taea Jehová daenikiaki. Jaskaken ja napaku kenakin: “Acorki”, amisbuki. Nukun janchawen kenadan, “Chakabu Atimapaki” ikaki.

**Jaska watan maewan Ai jau ibuwaxanunbun
Jehován jatu yununikiaki, na janchadan**

8 ¹Januxun Jehován Josué ana yuikin: “Ai anu jiweabuwen natian ana datei punu nukayamawe. Min junibu detenamenikabu dasibi iyui Ai anu mapekexanwen. Jadixun ean matu medabewakin Ai xanen ibu inun, jawenabu inun jawen mae inun, jawen mai pakea matu achimakin mina en mia wamaxanaii. ²Jericó inun jawen xanen ibu man yamawashina keska wakin Ai inun jawen xanen ibu jabiaskadi waxankanwen. Jakia man ma jatu maema jatun mabu inun jatun inabu achitan matun ibu wakin bixankanwen. Jatu bepadani jatun maewan pechiudi detenamenikabu ichapa jau junexun manatanunbun, june jatu yunuwe, ikis na jabia meshu medan”, aka

³jatun detetiya detenamenika dasibibu Ai anu jau bununbun, iwanan, 30,000 detenamenikabu katuxun meshu medan bebunkidi jau bununbun ⁴Josué jatu yunukin: “Ea ninka peidawakanwen. Ai jiweabu nun jatu detenunbun matu dukun bui jatun maewan pechiudi dapi junexun nuku manayuxankanwen. ⁵Janua jatun maewan besuudia ea inun nukunabube nun kemai jaskashinabu keskakin nuku detekatsi taxnibidanaibu jatu padain paxai nun chintunkidanaya ana uatian nuku ashian keska dabanen shinain nuku detenun ika jatun mae anua kainbidanxankanikiki. ⁶Nuku chibain jaskabidan nuku ashian keska wanun ika jatun maewan anua kainbidanaibun nun jatu ninikin akawanbidana nuku chibain beaibu jaska wakin padankin jatun mae anua nun jatu iwekubidanxanaii. Nun jaskai Ai anuabun uintan: ‘Jaskashinabu keskai nukuwen datei ana kushibainkanikiki’, ika ⁷nuku chibain jatun mae jenebidanaibu jatu uintan nukun mekenika Dios Jehován matu medabewaiwen taea man junea anua kushibidan jatun maewan achixankanwen. ⁸Jatun maewan achitan kuakin taewayuxankanwen. Jehován jancha chibankin jawen janca en matu yunua kaneama axankanwen”, jatu watan

⁹yunukin Josué jatu nichian meshu medan june bui Ai badi jikiaikidi anu Betel inun Ai tsisumen junexun jatu bepadain buxun jabun jatu manaibun jakia Josué jawenabube niti ika uxashini ¹⁰penaya bestentan detetiya junibu detenamenikabu ichawaxun jawen xanen ibu bexmasbubetan jatu iyui mapekei ¹¹Ai besusi nortekidia kematan napaku ewapa kexa betsaudi pean xubu wabu ¹²meshu medan ja kachu ana 5,000 junibu detenamenikabu katuxun juni betsabu yunushinabubetan jatun maewan Ai jau june

achixanunbun Josué jabudi yunua ¹³jatu padain jatun maewan nortekidi Israelin enabu detenamenikabu ichapa xabakabi manaibun jatun maewan badi jikiaikidia detenamenika betsabu junea maniabun dateama jabias meshu medan Josué ja mesti bebui napaku namakis niti ika

¹⁴ukedi xabakabi maniabu Ai xanen ibun uinbiakin pechiudi Jordán napaku anu june manabaiabun unandiana penamajaida Ai anua juni dasibi bestentan Israelin enabu ana detenun ika jawaida jatun xanen ibube jatun maewan besusi kainbidan ¹⁵jatube detenamei taeibun Israelin enabun jatu padain datei keskai janu tsua jiweabumakidi kushibainaibun ¹⁶jau jatu detekin chibanunbun jawen maewan mishki kene medanua jatun xanen ibun juni dasibi kena Josué inun jawenabu chibankin Ai xanen ibun jatun maewan anua jatu iweaya ¹⁷jatun mae jikiti xui bepentan bepuama jenebainkin Israelin enabu dasibibu chibainbuwen taea jatun maewan anua Ai inun Betel anua juni detenamenikabu tsuan jatu meketidu jayabumaken

¹⁸januxun Jehová Josué ana yuikin: “En mia achimaiwen taexun janu niti itan min jashiwen Aikidi metuwe”, aka jawen jashi sanankin Aikidi Josué metua ¹⁹juneshinabun uintan jawaida beni kushibidani jikixun jatun maewan Ai achitan chiwen kuakin taewaibun ²⁰⁻²¹Ai junibu natsaukekauan jatun mae kuin ichapa nai anu puebainai uin datei jani paxatidubuma Israelin enabu jabu junei bushianbun Ai ma achixun kuaibun jawen kuin uintan Israelin enabu paxai bui chintuntan Ai junibu detekin taewaibun ²²Ai mae kuakin taewatan juneshinabu taxnibidankin jatu detediabidanaibun jani paxatidubumaken nekexudi inun ukexudi jatu dasibi detebaunabu tsua paxama tsua jiweama ²³jatun xanen ibu besti jiwemakin achitan Josué anu iwenibukiaki.

²⁴Jatun maewan anua taxnibain jatu chibanbainabu Israelin enabun jatun machatu chaipawen Ai anuabu jatu detekin keyutan chintunbidan Ai anu jikixun dasibi jabu detebaunabu ²⁵Ai anu jiweabu dasibi jabiastian dete keyuabu 12,000 juni inun ainbu mawai keyuabu ²⁶Ai anuabu yamawakin keyudiabuma jawen jashi Josué sananbainaya ²⁷jaska Jehová Josué yuishina keska wakin jatun mabu inun jatun inabu Israelin enabun bikin ibuwakin keyunibukiaki. ²⁸⁻²⁹Jatun mabu inun jatun inabu taxnimakin keyutan jau kuakin keyununbun Josué jatu yunua ana kuakin keyuabu dispiwen jau xanen ibu tenexnunbun jawenabu Josué yunua ji anu duntankin Ai xanen ibu tenexabu badi jikiaya Josué jatu ana yunua jawen yuda butexun jawen mae jikiti xui anu udentan jawen yudaki mishki tude midima puta puta akin maspu wanibukiaki. Ai anu jiwe tibi ma di iki keyuni inun mishki tude midima maspu wanibu uinpaketidubu natian uindiatidu jayaki.

**Diosun yunuti inun jawen nemati Mati Ebal anuxun
Josué jatu yuixunikiaki, na janchadan**

³⁰Diosun jatu ana medabewaiwen taexun Mati Ebal anuxun jawen kenwanti chi tapu Josué wakin ³¹Jehová tsuma Moisin Israelin enabu

yunuxun jawen unanmati una medan kenekin: “Jawen mane tsatiwen mishki kedan wama jakia mishki kedanma besti manchinkin jawen kenwanti chi tapu jau apakexanunbunwen”, ani keska wakin Josué jaska chi tapu waken Israelin enabun ina awa inun chaxuwan ichapa tesenxun jawen kenwanti inun jawen daewati wakin jabun ina Jehová menu keyuxunabu ³²januxun chi tapu mishki mania tunku betsa betsapaki Moisin jatu unanmani jancha Josué xexakin keneai Israelin enabun uinibukiaki, na jabias jancha Moisin jatu kenexunidan. ³³Mati Guerizim inun Mati Ebal namakis napaku anu Jehová jatube yubakani jancha aduni bau ia Diosbe jawenabu janchaxunikabu mapuabu jawenabu jau pepawanunbun jaska ja dukun Moisin yununi keska wai Israelin enabu mae jidabi inun, jatun xanen ibubu inun, jatun xanen ibu bexmasbu inun, pepabu inun chakabubu unanikabu inun, jawenabu kayabi inun, yuda betsa betsapa jatube jiwekubidanaibu jatu ichawatan jatu paxkakin jatidi Mati Guerizim bebun jatidi Mati Ebal bebun mapuabu uinanandabekin ninkaibu ³⁴jawen unanmati jancha tibi Diosun pewati jancha inun Diosun kupiti jancha Moisin unanmani una anua jancha kushipawen Josué dasibi jatu yuixunkin ³⁵Moisin yunuti inun jawen nemati jancha dasibi jawa jeneama junibu dasibi inun ainbu dasibi inun bake mishtinbu dasibi inun nawa betsa betsapabu jatube jiweabu Josué jatu yuixunaya jawen jancha ninkanibukiaki.

**Jawenabu mae jidabitun jau Dios jeneyamaxanunbun
Josué jatu yusinikiaki, na janchadan**

23 ¹Badi ichapa Jehová jatu detenamemakin medabewakin keyuken nawa betsa betsapa jiwebaunabube Israelin enabu ana datenameabumaken Josué anibui mestebujaidatan ²Israelin enabu jatun xanen ibubu inun jawen xanen ibu bexmasbu inun jawen pepabu inun chakabu unanikabu inun jatun policiabu kenakin jatu ichawatan Josué jatu yuikin:

“Badi ichapa kai ma en matu anibujaidaxunaki. Ea ninkaidakanwen. ³Matu medabewakin nawa xukua betsa betsapa jiweabu Jehová jabu matu nichinxunaya jawen daya dasibi matuwen detenameai man uinkubidanshinaki. ⁴Jene Jordán inun badi jikiaikidi ianenwan ewapa Mediterráneo namakis nawa betsa betsapabu en yamawani inun nawa betsa betsapabu nun matu nichinxundiamaki. Jatun mai pakea tibi man janu ibu waxanaibu en matu paxkaxuna jawen unantiwen bikin matunabu xukua tibi jau janu jiwekubainxanunbun man bimaki. ⁵Jaska matu yubani keska wakin tsuabuda man nichindiana jatun mae tibi mebinkin matu bebunkidi Jehová jabu matu nichinxunaya jatun mai pakea tibi man ibu waxanaai.

6-7 Jaskaken nawa betsa betsapabu man nichindinama man jatu jaibuwatan, jatun yushibubu kena man yuiyamaxanun inun, jatun yushibubu datan akin juni betsa man yubamayamaxanun inun, jatun yushibubu man duawayamaxanun inun, jatun yushibubu kenwain man danti iyamaxanun, jaskawen taexun jawen unanmati una medan Moisin matu kenexuniki, matu nemakinan. Bai tanabainai keska wakin yusiudi inun yusmaudi dabekeama jaska Moisin matu kenexuni chibankin jawen nemati tibi ninkakin jawen yunuti tibi akubainkin uindapakexankanwen, kushipai mestenepaidan. 8-9 Jaska man akubainai keska wakin matun mekenika Dios Jehová jeneyamapakexankanwen, matu bebunkidi nawa betsa betsapa kushipayabu nichinxuniwen taexunan. Ja inun, matu medabewaya tsuabunda matu nematidubuma iniki. 10 Jaska matu yubani keska wakin matun mekenika Dios Jehován jatu ichakawamiswen taexun matu bestichaitun 1,000 junibu man nichintiduki, jatu kushimabainkinan. 11 Jaskaken ibubis mekekin matun mekenika Dios Jehová bechipaijaidakubainkanwen. 12 Jakia Diosun jancha chibain man chintunkin nawa betsa betsapa nenu jiwediabu jaibuwatan jatun ainbuaibu ainwankubaini jatuki man dasiaya 13 ana matu bebunkidi Jehován jatu nichinxunama ixanikiki. Shinaindaxankanwen. Jakia jisin bidun keska wakin matu yabua inun dispiwen matu kakush kakush aka keska wakin matun bedu anu muxa tekea keska wakin padankin nawa betsabun matu ichakawaibun na mai pepa matun mekenika Jehová Diosun matu ibu wamani anua man debui keyuxanaii, yamaidan. Man jaskatiduwen taexun matun mekenika Jehová Dios putataskayamaxankanwen.

14 Yuda dasibi ixanaibu keskai ikis eadi en matu mawaxunxanaii. Jawada pepa matun mekenika Dios Jehován matu yubani axunkin ma keyushinadan, matun jointi medan inun matun yushinwen man unanjaidaii. Dasibi matu axunkin jawen yubati jancha dasibi jakimama ishianki. 15-16 Jakia jawen yubani jancha danankin yushibubu bebun ana duawai man danti ixun jatu kenwanxanaya matuki dakekin matuki ana sinatajaidakin jati ikis matu duawamis keska wakin ana akama jakia betsa betsapa matu tenemakin yupukin na mai pepa matu ibu wamani anuxun tede akin Jehován matu jawaida yamawaxanikiki, kupikinan”, jatu watan

Josué jawen jenekin jatu jancha wanikiaki, na janchadan

24 1 badi betsatian Siquem mae anuxun Josué Israelin enabu xukua dasibi jatu ichawatan januxun jatun xanen ibubu inun, jatun xanen ibu bexmasbu inun, ja idabeaibu unanxun jatu pewanikabu inun, mekenika betsabu jau Dios bebun mapui benunbun jatu kena bea ja dapi mapuabun 2 Israelin enabu dasibi Diosun jancha Josué jatu yuikin:

—Eska nukun xenipabu Israelin mekenika Dios Jehován ea yuishinaki. Matu yuinun ea ninkakanwen: “Jenewan Éufrates ukedi kexa betsauidixun matun xenipabu Téráh inun jawen juni bake dabe Abraham inun Nahor jiwexun yushin betsa betsapa duawakin kenwanpaunibukiaki. ³Jaskai jiweabun Jenewan Éufrates kexa anu jiwebiaken matun xenipabu Abraham besti katubidankin iwenixun Canaán nawabun mai pakea anu jiwemakubaunkin jawenabu jau pajaidaxanunbun jawen juni bake Isaac en inaniki. ⁴Januxun Isaac yumeimaken jawen juni bake dabe Jacob inun Esaú en inandianiki. Jawen juni bake ma ewa dabeabu Esaú mananan Mati Seír mai pakea en ibuwamaniki. Jakia Jacob inun jawen juni bakebu Egipto anu bunibuki. ⁵Chipu Egipto anuxun matun xenipabu ichakawaibun Moisés inun Aarón yunutan januxun jawen dateti damiwakin eandi Egipto anu jiweabu tenankin ichakawakubainkin janua matun xenipabu en jatu taxnimabidaniki. ⁶Egipto anua jatu taxnimabainkin en jatu iyuaya Ianenwan Tashipaki kemai buaibun ana Egipto nawabun jatu achinun ika jatun caballo ichapaki katsume buaibu inun caballo tadanti ichapadiki jawen bukin jatu chibanbidanaibun ⁷jatuwen datekin ea yukaibun jabu inun Egipto nawabu namakis paxkakin kebenkin en meshu waniki. Chipu Ianenwan Tashipa matun xenipabu pukebainaibun Egipto nawabundi jatu chibain pukebainpananbun jenewen achimakin en jatu yamawakin keyuni jaska man unaiin. Janu tsua jiweabumanu badi ichapa en kushipa uin man jiweakeakekubidani man unandiaii. ⁸Janua Jene Jordán kexa betsaudi ja Amorreo nawabun mai pakea anu en matu iwea matube detenameaibu en matu medabewakin jatu maemamaya detekin man jatu nichinkin jatun mai pakea tibi man ibuwakubidanimabuki. ⁹Januxun Siporin bake Balac Moab nawabu xanen ibun matu maemakatsis ikin jau matu yupuyunun Beorin bake Balaam kenakin jawenabu Balacnen jatu imatanken ¹⁰jakia Balaam matu yupunun ixun ea yukabia en jaska yunuamawen taexun matu yupumamakin jawen pepa jancha besti yuimakin matu yaushikin medabewakin en matu mekeyamaki. ¹¹Jene Jordán pukebidan Jericóki kematushitan man jatube detenameaibu en jatu ichakawakin babuwaken man jatu detekin keyuniki. Ja nawabu en jatu babuwaya Amorreo nawabu inun, Ferezeo nawabu inun, Canaán nawabu inun, Hitita nawabu inun, Gergeseo nawabu inun, Heveo nawabu inun, Jebuseo nawabu man jatu maemakin yamawaimaki. ¹²Januxun man judiama bebunkidi i bina midima en yunua jatuwen datei Amorreo nawa xanen ibu dabe inun jawenabu en jatu nichian matun deteti machatu chaipawen inun matun piawen man jatu deteama ibubis jatun mae jenebaini paxayamabuki. ¹³Bai man sepama inun jiwe man wama en matu ibu wamawen taexun jatun mae tibi anu jiwekin uva nishi inun aceituna ji juni betsan banani anua jawen bimi bikin ichawaxun man piiai”, akin Diosun jawen jancha ea yuishinaki.

¹⁴ Jaskaken Jehováki mesekubainxankanwen. Padanananma ikun kayabi juinti xabakabiwen Dios duawakubainxankanwen. Ukedi jenewan Éufrates inun Egipto anuxun matun xenipabun yushin betsa betsapa kenwanbiapaunibun jabu jenetan Jehová besti duawakin kenwankubainxankanwen. ¹⁵ Jakia Jehová man duawakatsi ikama jadatu yushinin jancha man chibankatsi ikimenkain, ikis katukanwen. Jenewan Éufrates ukedi matun xenipabun yushin betsa betsapa jabun kenwanpaunibudan, jabumenkain. Nenu jiwexun Amorreo nawabun yushin betsa betsapa jabun kenwainbumenkain, matun shinankanwen. Jakia en ain inun en bakebubetanan, Jehová duawakin nun chibanpakexanaii, jeneamadan— jatu waya ¹⁶ dasibibun ninkatan Josué kemakin:

—Nuku jaska shinanxunyamawe. Jehován jancha jenetan yushibu betsa betsapa nun chibankatsi ikamaki. ¹⁷ Egipto anuxun nukun ibubu tsumawatan dayajaidamakin jatu ichakawaibun nukun mekenika Dios Jehován Egipto anua nuku paxawakin nenu nukun ibubube nuku iwekubidaniki. Jabiatiani nukun bedubi jawen kushipa pejaidawen dami betsa betsapa wakin nuku e imakubidankin janu nun kai anu inun tsuabuda nun dainbainai jatu nuku dainmakin nemaxunkin nuku mekekubidanimaki. ¹⁸ Jaska wakin nuku bebunxun na mai pepa anu jiwebaunabu nun kaikidia nawabu dasibi Jehován nuku jatu nichinxunimaki, nenu Amorreo nawabu kushipabu jiwebiaken jabudi paxawakinan. Jaska dasibi nuku axunkubainmiswen taea nukundi nun duawakatsis ikaii, nukun mekenika Jehová Diosdan. Ja besti duawakin nun chibanpakexanaii, jeneamadan— ikaibuwen taexun

¹⁹ Josué jatu yuikin:

—Nukun mekenika Jehová tadi medibi pepa jiwemistun jawenabu yaushinikawen taexun jawada chakabu mei jaki patapakin man duawakin pewatidubumaki. ²⁰ Jakia Jehován jancha jenetan yushibu betsa betsapa man kenwainbu matun chakabu ana buama shinankin matu duawabianixun ichakawakin matu yamajaida waxanikiki, kupikinan— jatu wa

²¹ Israelin enabun Josué kemakin yuikin:

—Jaska min yui ai keska nun jaskatidumaki. Jawa jeneama Jehová besti nun duawapakekatsis ikaii— akabu

²² Josué ana jatu yuikin:

—Jehován jancha besti chibanun ixun matunmebi unantinain man janchaii— jatu wa dasibibun ana yuikin:

—Jaa. Chanimaki. Jabiaskas nun shinaii— ikaibun

²³—Jaskakenan, ikis yushin betsa betsapa dami matu anua puta keyutan matun shinan betsa watan matun xenipabu Israelin mekenika Dios Jehován jancha besti matun juinti jidabiwen shinanpakexankanwen, padanmadan— jatu wa

²⁴dasibibun ana yuikin:

—Jawen jancha dasibi ninkakin jawada nukun mekenika Dios Jehován nuku yunua besti nukun juinti jidabiwen duawakin nun chibanpakexanaii, jawa padanmadan— akabu

²⁵jabias xabatian Siquem anuxun jaska wakin duawaxanaibu Josué jawenabube yubakatan jawen yunuti inun jawen nemati jancha ichapa jatu yuikin yunutan ²⁶jabias jancha yunuxu Diosun jancha yusinti una medan jatu kenexuntan jawen jatube yubakani jiwe dapi ji ewapa kushipa naman mishki ewapa jatu benimatan ²⁷jatu dasibi ana yuikin:

—Uinkanwen. Na mishkidan, ja chanipaketi keskaki. Padananain Jehováki man chakabutidu jawen unanmati keska Jehován jawen dasibi nuku jancha waxuki, nun chakabuwaibu ja mishkipan nukukidi metutidu keskadan— jatu watan

²⁸januxun Josuéen jatun mai pakea tibi anu jatu nichinikiaki.

Josué mawanikiaki, na janchadan

(Jue 2.6-10)

²⁹Jatu jancha waima binupaketan Nunen bake Josué Jehován tsuma 110 año mawaken ³⁰Efraínen enabun maiwan pakea mananan Mati Gaas nortekidi Timnat-sérah anu jawen mai pakea janu Josuéen ibuwani anu jawen yuda maiwanibukiaki. ³¹Josué xanen ibuatian Israelin enabu jatun mekenika Jehová chibankubainibukiaki. Josué jiweatian inun ma mawabaiimaken duawakin jatun Jehová jeneama inibukiaki. Janua ja xanen ibu anibu unanepa betsabundi dasibi Jehován jatu axuni shinankubaini jiweyuabundi Israelin enabun Jehová Dios chibanpakenibukiaki.

Josén xau bekubidanixun Siquem anu jawenabun

maiwanibukiaki, na janchadan

³²Egipto anua Josén xau besti bekubidanixun mae Siquem anu Hamorin juni bakebu Siquem inun jawen betsabu anua 100 oro pei jexewen bai bikin Jacobun ibuwani anu Josén xau maiwanibukiaki. Natianan, ja bai Josén bababunakiaki.

Aarónen bake Eleazar mawanikiaki, na janchadan

³³Aarónen juni bake Diosbe jawenabu janchaxunika Eleazar mawaken Efraínen enabun maiwan pakea mananan anu Eleazarin juni bake Finees mae betsa ibu wamani anu jawen yuda maiwanibukiaki.